



Sesida dals

Communitgà ils

Protocol nr.

13 d'avust 2019

14 d'avust 2019

557

Dumonda Märchy-Caduff

concernent l'analisa da la situaziun da la "realisaziun da la promoziun integrativa"
en la scola populara grischuna

Resposta da la regenza

Sa referind a las prescripziuns da la confederaziun en l'art. 20 da la lescha federala davart l'eliminaziun dals dischavantatgs envers persunas cun impediments dals 13 da december 2002 (lescha davart l'egualitad da persunas cun impediments, LImp; CS 151.3) sco er suenter avoir fatg emprovas en il rom dals projects da pilot a Tavau ed a Tusaun è vegnida concludida la realisaziun integrativa da las mesiras da la pedagogia speziala, ch'è vegnida francada en la lescha davart las scolas popularas dal chantun Grischun dals 21 da mars 2012 (lescha da scola; DG 421.000). La promoziun integrativa tutga tar las mesiras simplas che vegnan garantidas e realisadas dals purtaders da la scola regulara sin basa da l'art. 47 al. 1 da la lescha da scola ed ordinadas tenor l'art. 48 al. 1 da la lescha da scola. Sa referind a la realisaziun da l'incumbensa Claus concernent la reintroducziun da la classa d'introducziun sco er da l'incumbensa Michael (Donat) concernent la cumpetenzza e l'egualitad da las furmas da la scolaziun en il sector simpel da la pedagogia speziala pretenda la dumonda qua avant maun in'analisa da la situaziun da la "realisaziun da la promoziun integrativa" en la scola populara grischuna. En connex cun la realisaziun da questas duas incumbensas Claus e Michael (Donat) ha l'uffizi per la scola populara ed il sport (uffizi) laschè far in'expertisa giuridica per incumbensa dal departament d'educaziun, cultura e protecziun da l'ambient (DECA). Avant che far ils proxims pass ston vegnir spetgads ils resultats da questa expertisa.

Davart las singulas dumondas po la regenza prender las suandantas posiziuns:

Tar la dumonda 1: Dapi l'entrada en vigur da la lescha da scola il 1. d'avust 2013 sustegna l'uffizi ils purtaders da scola tar la realisaziun da la lescha da scola incl. da las mesiras simplas da la pedagogia speziala en il rom da las structuras regularas. Da menziunar èn en spezial l'infurmaziun currenta davart las prescripziuns chantunalas, la cussegliaziun en cas da dumondas avertas, l'accompagnament da l'ulteriur

svilup da la scola al lieu sco er – en cas da basegn – il scleriment da cas singuls tras ils posts spezialisads da l'uffizi, particularmain tras l'inspecturat da scola e tras il servetsch psicologic da scola. Sin basa da la lescha da scola e sin fundament da l'approfondaziun specifica cun las parts participadas davart differents temas da l'integrasiun èn resultadas directives ed agids da realisaziun che gidan fin oz ils portaders da scola a realisar ed a sviluppar vinavant cuntinuadamain lur purschidas. Tras il process da cussegliaziun da vart dals posts spezialisads da l'uffizi survegnan ils singuls portaders da scola d'ina vart sustegn tar la realisaziun; da l'autra vart vegnan els rendids attents en cas da basegn ad adattaziuns necessarias ed a secturs da svilup. Questa cussegliaziun vegn cumplettada tras la surveglianza, che controllescha, sche las disposiziuns legalas vegnan observadas. In'analisa da la situaziun en il senn pli stretg n'è betg stada necessaria fin ussa en vista a quests fatgs. En il rom da la proxima revisiun parziala da la lescha da scola duai vegnir sclerì, sch'igl è necessari d'examinar la realisaziun da l'integrasiun. En tge dimensiun, en tge furma e cun tge meds ch'ina tala examinaziun po e duai avair lieu en cas da basegn, sto vegnir decidì cur ch'igl è uschè lunsch.

Tar la dumonda 2: L'observaziun da las prescripziuns legalas en il sector simpel da la pedagogia speziala è chausa dals singuls portaders da scola. Per ademplir lur obligaziuns en il sector simpel da la pedagogia speziala survegnan els il sustegn da differents posts spezialisads tenor l'art. 91 da la lescha da scola. Latiers tutgan las visitas da surveglianza regularas, il giudicament e la promoziun da la scola populara sco er l'informaziun e la cussegliaziun da las direcziuns da scola e da las personas d'instrucziun. En cas da reclamaziuns da vart da las personas responsablas per l'educaziun vegn examinada la situaziun al lieu e vegnan eventualmain instradads pass correspundents. En il rom da la surveglianza examinescha l'inspecturat da scola, sch'ils singuls portaders da scola observan las disposiziuns da la lescha da scola. Tar il DECA n'èn avant maun naginas annunzias da surveglianza correspundentas da vart da la surveglianza da scola. Uschia pon ins partir dal fatg ch'ils portaders da scola observian las disposiziuns legalas.



En num da la Regenza

Il president:

Il chancelier:

Dr. Jon Domenic Parolini

Daniel Spadin